

SAMÞYKKT

um breytingu á samþykkt um stjórn Stykkishólmsbæjar, nr. 731/2013, með síðari breytingum.

1. gr.

8. gr. samþykktarinnar breytist og verður svohljóðandi:

Stykkishólmsbær heldur reglulega fundi bæjarstjórnar í Ráðhúsinu í Stykkishólmi, á fimmtudögum, kl. 17.00.

Bæjarstjórnarfundir er heimilt að halda með rafrænum hætti þannig að hluti bæjarstjórnarmanna eða allir taki þátt með rafrænum hætti.

Aukafundi skal halda þegar forseti bæjarstjórnar eða bæjarstjóri telur það nauðsynlegt eða ef þriðjungur bæjarstjórnarmanna óskar þess.

Bæjarstjórn Stykkishólmsbæjar er heimilt að fella niður reglulegan fund sinn, enda sé tillaga um slíkt samþykkt mótatkvæðalaust á næsta fundi bæjarstjórnar á undan.

Bæjarstjórn Stykkishólmsbæjar er heimilt að fella niður reglulega fundi bæjarstjórnar vegna sumarleyfis

2. gr.

14. gr. samþykktarinnar breytist og verður svohljóðandi:

Bæjarstjórnarmanni er heimilt að taka þátt með rafrænum hætti í fundum bæjarstjórnar og nefnda og ráða á vegum sveitarfélagsins. Bæjarstjórnarmenn skulu þó að jafnaði mæta á fundarstað, nema brýnar ástæður mæli með því að slíkur búnaður sé notaður. Þegar bæjarstjórnarmaður tekur þátt í fundi með rafrænum hætti skal hann vera staddur í sveitarfélaginu eða í erindagjörðum innan lands á vegum sveitarfélagsins. Að öðrum kosti skal varamaður boðaður á viðkomandi fund. Tryggja skal jafna möguleika allra fundarmanna til þátttöku á fundi og í atkvæðagreiðslu, óskerta möguleika þeirra til að fylgjast með því sem þar fer fram og öryggi samskipta milli fundarmanna.

Fulltrúar í nefndum sveitarfélagsins hafa sömu heimildir og sveitarstjórnarmenn skv. 1. mgr.

Um framkvæmd fjarfunda að öðru leyti gildir auglýsing um leiðbeiningar um ritun fundargerða sveitarstjórna, sbr. 2. mgr. 19. gr. sveitarstjórnarlaga, og eftir atvikum sérstakar reglur Stykkishólmsbæjar um framkvæmd fjarfunda.

3. gr.

3. töluliður í B-lið 47. gr. samþykktarinnar breytist og verður svohljóðandi:

Skipulagsnefnd. Bæjarstjórn kýs fimm fulltrúa og jafnmarga til vara skv. 6. gr. skipulagslaga nr. 123/2010. Auk þess fer nefndin með umferðarmál samkvæmt lögum nr. 77/2019. Nefndin starfar samkvæmt erindisbréfi.

4. gr.

Í samræmi við heimild í 52. gr. samþykktarinnar bætast við samþykktina viðauki III um embættisafgreiðslur skipulagsfulltrúa.

Viðaukinn er birtur með samþykkt þessari.

5. gr.

Samþykkt þessi sem bæjarstjórn Stykkishólmsbæjar hefur sett samkvæmt ákvæðum 9. gr. og 18. gr. sveitarstjórnarlaga nr. 138/2011, staðfestist hér með til að öðlast þegar gildi.

VIÐAUKI III

Embættisafgreiðslur skipulagsfulltrúa.

1. gr.

Sviðsstjóri skipulags- og umhverfissviðs eða eftir atvikum sérfræðingur á skipulags- og umhverfissviði sé sviðsstjóri byggingarfulltrúi fer með hlutverk skipulagsfulltrúa í samræmi við ákvæði skipulagslaga nr. 123/2010.

2. gr.

Skipulagsfulltrúi afgreiðir eftirtalin verkefni skipulagslaga nr. 123/2010, án staðfestingar bæjarstjórnar, sem eru á verkefnasviði skipulagsnefndar, sbr. 2. mgr. 6. gr. skipulagslaga, og skilgreind eru sem verkefni sveitarstjórna í lögunum, sbr. 2. mgr. 42. gr. sveitarstjórnarlaga nr. 138/2011 og 52. gr. samþykktar þessarar:

- a) Framlengir frest til að gera athugasemdir við auglýstar eða grenndarkynntar tillögur,
- b) Gefur út framkvæmdaleyfi skv. 13. gr. skipulagslaga fyrir framkvæmdir sem eru í samræmi við gildandi skipulagsáætlanir.
- c) Leitar eftir umsögnum viðeigandi umsagnaraðila áður en tekin er afstaða til útgáfu framkvæmdaleyfis, sbr. 5. mgr. 13. gr. skipulagslaga.
- d) Afgreiðir tillögu um óverulega breytingu á deiliskipulagi til Skipulagsstofnunar skv. 2. mgr. 43. gr. skipulagslaga, hafi engar athugasemdir borist við grenndarkynningu. Skipulagsfulltrúa er einnig heimilt að afgreiða tillögu um óverulega breytingu á deiliskipulagi til Skipulagsstofnunar skv. 3. mgr. 44. gr. skipulagslaga,
- e) Stöðvar framkvæmd sem er hafin án þess að framkvæmdaleyfi sé fengið fyrir henni, framkvæmdaleyfi brýtur í bága við skipulag, hafi fallið úr gildi eða framkvæmd sé í ósamræmi við útgefið framkvæmdaleyfi eða skilyrði þess. Einnig getur skipulagsfulltrúi krafist þess að hin ólöglega framkvæmd sé fjarlægð, jarðrask afmáð eða starfsemi hætt. Sinni framkvæmdaraðili ekki þeirri kröfu er heimilt að framkvæma slíkar aðgerðir á hans kostnað, sbr. 53. gr. skipulagslaga.
- f) Með þriggja mánaða fyrirvara, getur skipulagsfulltrúi lagt dagsektir á framkvæmdaleyfishafa hafi framkvæmdaleyfisskyld framkvæmd stöðvast í tvö ár, sbr. 3. mgr. 15. gr. skipulagslaga. Skipulagsfulltrúa er heimilt að beita dagsektum til að knýja menn til framkvæmda á ráðstöfunum sem þeim er skylt að hlutast til um samkvæmt skipulagslögum eða láta af atferli sem er ólöglegt, sbr. 1. mgr. 54. gr. skipulagslaga.
- g) Framsendir, vísar frá eða synjar erindum sem beint er til skipulagsnefndar og/eða bæjarstjórnar og eru bersýnilega í ósamræmi við skipulagsáætlanir.

3. gr.

Framangreindar afgreiðslur skipulagsfulltrúa skulu kynntar á næsta reglulega fundi skipulagsnefndar sem og bæjarráðs.

4. gr.

Skipulagsfulltrúi getur ávallt vísað máli skv. 2. gr. til skipulagsnefndar sem gerir tillögu til bæjarráðs sem tekur ákvörðun um fullnaðarafgreiðslu málsins. Ef ætla má að aðili máls muni ekki sæta niðurstöðu

skipulagsfulltrúa skal skipulagsfulltrúi vísa málinu til afgreiðslu skipulagsnefndar sem svo leggur til afgreiðslu til bæjarráðs til fullnaðarafgreiðslu.

5. gr.

Um afgreiðslu skipulagsfulltrúa gilda, eftir því sem við á, ákvæði skipulagslaga nr. 123/2010, með síðari breytingum, ákvæði reglugerða settra á grundvelli laganna og samþykktir Stykkishólmsbæjar ef við á.

6. gr.

Við birtingu ákvörðunar skal kynnt að um fullnaðarafgreiðslu sé að ræða á grundvelli heimildar í 42. gr. sveitarstjórnarlaga og samþykktar þessarar. Að öðru leyti skal gæta að ákvæðum 20. gr. stjórnssýslulaga nr. 37/1993.

Óski aðili frekari rökstuðnings vegna afgreiðslu skipulagsfulltrúa skv. 2. gr. eða komi hann á framfæri kvörtun, skal honum leiðbeint um heimild til að óska endurupptöku erindis í bæjarráði með hliðsjón af 24. gr. stjórnssýslulaga nr. 37/1993. Endurupptaka er heimil innan þriggja mánaða frá því að aðila máls var eða mátti vera kunnugt um ákvörðunina. Telji bæjarráð að skilyrði um endurupptöku séu fyrir hendi skal skipulagsnefnd taka erindið upp að nýju og gera tillögu til bæjarráðs sem tekur ákvörðun um fullnaðarafgreiðslu málsins.

Aðila máls skal leiðbeint um rétt hans til að skjóta málinu til úrskurðarnefndar umhverfis- og auðlindamála samkvæmt lögum nr. 130/2011, þ. á m. um kærufrest.